

新元史

第二册

本紀第一

新元史卷之一

賜進士出身日講起居注官翰林院侍讀國史館纂修膠州柯劭忞撰

序紀

蒙古之先出於突厥本爲忙豁侖譯音之變爲蒙兀兒又爲蒙古金人謂之韃靼又謂之達達兒蒙古衣尙灰暗故稱黑達達其本非蒙古而歸於蒙古者爲白達達野達達詳氏族表其國姓曰乞顏特孛兒只斤氏太祖十世祖孛端察兒之後稱孛兒只斤氏皇考也速該又稱乞顏特孛兒只斤氏孛兒只斤突厥語譯義灰色目睛蒙古以灰睛爲貴種也蒙古初無文字世事遠近人

相傳述其先世與他族相攻部族盡爲所殺惟餘男女二人遁入一山徑路險巇僅通出入遂居之名其山曰阿兒格乃哀生二子長曰惱古次日乞顏乞顏義爲奔流急瀑言其勇往邁衆似之乞顏子孫衆多稱爲乞顏特又譯爲計牙特亦譯爲卻特特者統類之詞也又譯爲奇渥温温者國語之尾音也後以地狹人稠欲出山而塗已塞有鐵鑛洞穴深邃乃篝火洞中宰七十牛剖革爲筒而鼓之鐵石旣融徑路遂通蒙古舊俗元旦鍛鐵於鑪尊卑次第捶之其事蓋緣起於此乞顏之後有孛兒帖赤那譯義爲蒼狼其妻曰豁埃馬蘭勒譯義爲

慘白牝鹿皆取物爲名世俗附會乃謂狼妻牝鹿誣莫
甚矣孛兒帖赤那與豁埃馬蘭勒同渡騰吉思海徙於
斡難河源不見罕山之下生子曰巴塔赤罕巴塔赤罕
生子曰塔馬察塔馬察生子曰豁里察兒蔑兒干豁里
察兒蔑兒干生子曰阿兀站孛羅溫勒阿兀站孛羅溫
勒生子曰撒里合察兀撒里合察兀生子曰也客你敦
也客你敦生子曰搏鎖赤搏鎖赤生子曰合兒出合兒
出生子曰孛兒只吉歹蔑兒干其妻曰忙豁勒真豁阿
生子曰脫羅豁勒真伯顏其妻曰孛羅黑臣豁阿生二
子長曰都蛙鎖豁兒次日朶奔蔑兒干都蛙譯義爲遠

視鎖豁兒譯義爲一目言其一目能遠視也有豁里禿馬敦部長豁里刺兒台蔑兒干率所部至不兒罕山都蛙鎖豁兒見其女美爲弟朶奔蔑兒干娶之是爲阿蘭豁阿哈屯生二子曰不古訥台曰別勒古訥台朶奔蔑兒干卒阿蘭豁阿嫠居有孕衆疑之阿蘭豁阿曰夜有白光自天窗而入化爲黃人摩挲我腹斯殆神靈誕降不信請汝等伺之衆曰諾次夜果見白光出入羣疑乃釋旣而生三子長曰不忽合塔吉次日不合禿撒勒其次曰勃端察兒蒙合黑凡三子之支派蒙古稱之曰尼而倫譯義爲清潔以其爲神靈之允別派則謂之塔立

斤譯義常人也阿蘭豁阿嘗束箭五枝謂其諸子曰汝兄弟五人猶五枝箭分則易折若合爲一束誰能折之汝五人一心則堅強無敵矣其後宣懿皇后猶引此言以教太祖云阿蘭豁阿幼子勃端察兒蒙合黑沈默寡言家人謂之癡獨阿蘭豁阿曰此兒不癡後世子孫必有大貴者及阿蘭豁阿卒諸兄分家資不及勃端察兒蒙合黑勃端察兒蒙合黑乘一青白馬至巴勒諄阿刺勒飲食無所得見黃鷹搏雉勃端察兒蒙合黑繳而獲之鷹卽馴熟乃臂鷹獵雉兔以爲食有鄂郭爾察克部游牧於統格黎河亦時以馬乳奉之後諸兄悔來視勃

端察兒蒙合黑邀與俱歸勃端察兒蒙合黑曰統格黎河之民無所屬可撫而有也諸兄以爲然至家使勃端察兒蒙合黑率壯士以往果盡降之自是蒙古始有部衆勃端察兒蒙合黑之妻曰勃端哈屯生二子又娶一妻生子曰把林失亦刺禿合必赤生子曰蔑年土敦其妻曰莫拏倫生七子而蔑年土敦卒莫拏倫亦稱莫拏倫塔兒袞譯義有力也徙於諾賽兒吉及黑山之地是時札刺亦部强盛以千車爲一庫倫有七十庫倫恃衆與契丹相拒契丹渡克魯倫河大破之札刺亦敗衆遁至莫拏倫牧地其小兒掘速都遜草根食之莫拏倫乘

車出見而呵之曰此我之牧地何得踐蹋以車輾小兒有死者札刺亦人怒驅其牧馬以去莫拏倫諸子聞之不及甲而追之莫拏倫私憂曰吾兒無甲何以禦敵使其子婦載甲從之及至諸子已戰沒札刺亦人遂乘勝殺莫拏倫滅其家惟一孫海都尙幼乳母匿於酒甕中獲免海都父合赤曲魯克蔑年土敦之長子也先是蔑年土敦第七子納臣贅於巴兒忽氏故不及難至是歸惟海都及病嫗十餘人在焉有其兄所乘之黃馬自札刺亦逸歸納臣乃乘之至札刺亦牧地遇獵者納臣給殺之又遇牧馬小兒方擊髀石爲戲納臣亦殺之臂鷹

驅馬而返遂將海都徙於巴兒忽海都稍長納臣與巴兒忽怯谷諸部共立之蒙古稱罕自海都始率衆攻札刺亦虜其部衆爲奴後海都又徙於巴兒忽真土窟姆之地造一橋於巴兒忽真河以通來往名曰海都赤勒拉姆納臣則徙於斡難河海都卒長子伯升豁兒多黑申嗣伯升豁兒多黑申卒子屯必乃薛禪嗣屯必乃薛禪生九子皆有智勇部衆益强卒第六子合不勒罕嗣海都次子察剌孩領忽生子曰想昆必勒格想昆卽契丹之詳袞譯義辦事官也想昆必勒格生子曰俺巴孩後嗣合不勒之罕位合不勒罕有威望蒙古諸部莫不

降附金主聞其名召見禮遇甚優合不勒恐飲食中毒宴會輒託詞沐浴出而吐其食物一日酒酣合不勒拊掌而躍將金主之鬚左右呵其失禮合不勒皇恐謝罪金主釋不問仍厚賜遣之金之大臣謂縱去此人將爲邊患遣使要之返合不勒不從語倔强金人再遣使詰問合不勒他往以避之使者歸遇諸塗挾以入朝中道遇其諸達賽亦柱歹告之故賽亦柱歹贈以良馬使乘間逸去至夜使者以索繫其足次日得間始疾馳而返使者追及之合不勒次妻蔑台火魯拉思氏以所居之新帳居使者合不勒告其部衆曰不殺此人我終不免

汝等不助我則先殺汝等衆從之遂襲殺使者未幾合不勒病卒合不勒生七子不立其子而立其從弟俺巴孩爲罕先是合不勒妻呼阿忽豁阿其弟曰賽因特斤翁吉拉特人也延塔塔兒巫者治疾不效而卒執巫者殺之塔塔兒部衆怒與翁吉拉特構兵合不勒諸子助母黨與塔塔兒戰於貝闌色夷闕端之地合不勒第四子合丹刺傷塔塔兒酋瘡愈戰於攸刺伊拉克再戰於開兒伊拉克卒爲合丹所殺故塔塔兒仇蒙古俺巴孩旣立嫁女於塔塔兒自往送之塔塔兒遂執俺巴孩及其弟烏斤巴勒哈里獻於金金人以蒙古殺其使者乃

製木驢之刑釘俺巴孩兄弟於驢背俺巴孩將死謂從者布勒格赤曰汝歸爲我告合不勒罕七子中之忽圖刺及我合答安太石言我爲一國之主不忍兒女之愛以至如此後人當以我爲鑑若等將五指爪磨禿縱磨傷十指亦當爲我復仇又使告於金主曰汝假他人之手以獲我又置我於非刑我死則我之伯叔兄弟必能復仇金主曰此言可告汝部衆朕不畏也縱布勒格赤歸於是部衆共立合不勒第五子忽圖刺爲罕忽圖刺罕糾諸部復仇敗金人於境上大掠而去是時金熙宗皇統三年也其後金大定間童謠曰達達來達達去趁

得官家沒去處金世宗聞之曰此必韃靼將爲國患乃下減丁之令歲歲用兵北邊恣行殺戮蒙古諸部銜仇刺骨亦出沒爲金邊患金丞相完顏襄乃築長城以限之而使汪古部守其要隘至太祖伐金汪古部反爲蒙古嚮道焉忽圖刺驍勇力能折人每食盡一羊音吐甚洪隔七嶺之遠猶聞之一日出獵遇朶兒奔人欺其無從者欲追而殺之忽圖刺之馬陷淖中自馬上躍登於岸追者駭走家人聞遇朶兒奔以爲必死設筵祭之其妻獨不謂然及歸忽圖刺曰我出獵而徒手返何以對衆復入朶兒奔牧羣奪其馬中道獲野鴨卵盛以韡家

人乃徹祭筵以享其夫婦忽圖刺長子曰拙赤罕後率所部千人歸於太祖次日阿勒壇亦素附太祖後叛歸客烈亦部王罕初俺巴該爲金人所殺部衆會議立罕推族人朶答兒主議朶答兒請使哈答兒禿克主之哈答兒禿克讓於莫圖根莫圖根曰汝等公議立罕則事可定否則必有內亂言畢而出部衆遂共立忽圖刺爲罕及忽圖刺卒布拉火力兒等欲立塔兒忽台爲罕部衆不從於是諸部各立部長不相統屬爲尼而倫部長者曰也速該合不勒罕第二子把兒壇之子也是爲太祖皇考追謚烈祖神元皇帝自此塔兒忽台與烈祖有

隙塔兒忽台者合答安太石之子爲泰亦赤兀部長故
太祖屢爲泰亦赤兀部所困把兒壇娶於巴兒忽氏曰
蘇尼吉兒哈屯生四子長曰蒙哥禿乞顏次曰捏坤太
石捏坤太石長子曰火察兒善射從太祖攻討諸部屢
有功後從攻塔塔兒違軍令太祖奪其所獲遂與阿勒
壇奔王罕王罕敗復奔乃蠻太祖平乃蠻俱伏誅次爲
烈祖次日答力台亦叛附王罕後自歸於太祖太祖宥
之烈祖爲部長十三年屢伐金又討塔塔兒獲其二酋
曰帖木真兀格曰庫魯布哈諸部畏服客烈亦部王罕
爲其叔父古兒堪所攻乞援於烈祖烈祖逐古兒堪以

定客烈亦之亂王罕德之與烈祖約爲諳達後烈祖爲太祖求婚於翁吉刺氏中道至扯克扯兒之地遇塔塔兒人以毒酒飲之烈祖暴疾至家召察刺合額不格之子蒙力克以太祖兄弟託之而崩時太祖十三歲史臣曰元人數典忘祖稱其國姓曰奇渥溫氏而舊史因之我

高宗純皇帝旣命館臣改譯復據蒙古源流證元之國姓爲博爾濟錦氏數百載相沿之謬至我

高宗始爲之釐訂焉博爾濟錦卽孛兒只斤之異譯也今蒙古喀兒喀諸部非博爾濟錦氏不得爲台吉蓋猶自

別於庶姓云

新元史卷之一終